

REGLUGERÐ

um tollafgreiðslu hraðsendinga.

1. gr.

Reglugerð þessi gildir um tollafgreiðslu á hraðsendingum (express consignments) sem fluttar eru til landsins í flugi, fyrir milligöngu flutningsmiðlara, í samvinnu við erlend hraðflutningafyrirtæki.

2. gr.

Flutningsmiðlari sem óskar eftir heimild til að annast tollafgreiðslu á hraðsendingum samkvæmt reglugerð þessari skal uppfylla neðangreind skilyrði:

1. Stunda atvinnurekstur og hafa tilkynnt Hagstofu Íslands um atvinnustarfsemi sína og verið færður á fyrirtækjaskrá, sbr. lög nr. 62/1969;
2. hafa tilkynnt skattstjóra um starfsemi sína, sbr. 5. gr. laga nr. 55/1988, um virðisaukaskatt, og
3. hafa að mati tollstjóra sýnt fram á við gerð og frágang aðflutningsskjala að hann hafi til að bera fullnægjandi þekkingu á þeim lögum og reglum sem gilda um tollmeðferð innfluttra vara.

3. gr.

Flutningsmiðlari sem um ræðir í 2. gr. skal í skriflegu erindi til tollstjóra í því umdæmi þar sem hann er heimilisfastur sækja um heimild til að annast tollafgreiðslu á hraðsendingum. Í umsókn skal tilgreina eftirfarandi:

1. Nafn, kennitölu og aðsetur;
2. virðisaukaskattsnúmer og
3. hverjir hafi umboð til að skuldbinda hann með undirritun undirfarmskrár og aðflutningsskýrslu fyrir hans hönd, riti hann ekki sjálfur undir hana. Rithandarsýnishorn skulu fylgja umsókn.

Flutningsmiðlari skal þegar tilkynna tollstjóra allar breytingar sem verða á upplýsingum samkvæmt framanrituðu.

4. gr.

Flutningsmiðlari skal skila með umsókn sinni yfirlýsingu banka, sparisjóðs eða viðurkennds tryggingar- eða ábyrgðarfélags um að tekin sé skilyrðislaus sjálfsskuldarábyrgð á tiltekinni fjárhæð lánaðra aðflutningsgjalda, þ.m.t. virðisaukaskattur, og skal ábyrgðin auk þess taka til dráttarvaxta og annars kostnaðar sem leiða kann af vanefndum, sbr. 10. gr.

Flutningsmiðlari ákveður fjárhæð ábyrgðar sem jafnframt er hámark þeirrar fjárhæðar aðflutningsgjalda sem gjaldfrestur er veittur á innan hvers uppgjörstímabils, sbr. 9. gr. Telji tollstjóri ábyrgðarfjárhæð ófullnægjandi má hann ákveða lágmark hennar. Ábyrgð skal vera ótímabundin og uppsegjanleg af hálfu ábyrgðaraðila með ábyrgðarbréfi til viðkomandi tollstjóra með þriggja mánaða fyrirvara. Uppsögn breytir hvorki ábyrgð varðandi aðflutningsgjöld sem greiðslufrestur hefur verið veittur á fyrir gildistöku uppsagnar ábyrgðar né ábyrgð á greiðslu dráttarvaxta og annars kostnaðar. Eftir uppsögn ábyrgðar er tollstjóra óheimilt að tolla freiða hraðsendingar til viðkomandi flutningsmiðlara samkvæmt reglugerð þessari.

5. gr.

Engar takmarkanir eru varðandi tollmeðferð hraðsendinga samkvæmt reglugerð þessari aðrar en þær sem leiðir af ákvæðum um innflutningstakmarkanir og innflutningsbann samkvæmt lögum og reglum þar að lútandi, sbr. þó 2. og 3. mgr. 6. gr.

6. gr.

Hraðsendingar skulu afhentar beint frá farmflytjanda án fullnaðartollafgreiðslu í tollumdæmi þess tollstjóra sem hefur veitt flutningsmiðlara heimild til tollafgreiðslu á hraðsendingum samkvæmt reglugerð þessari. Við afhendingu hraðsendingar skal flutningsmiðlari afhenda tollgæslunni flugfarmbréf og undirfarmskrá í því formi, eintakafjölda og með þeim upplýsingum sem ríkistollstjóri ákveður.

Ef í hraðsendingu eru vörur sem háðar eru leyfi eða vottorðum skal jafnframt leggja þau fram við afhendingu.

Ef í hraðsendingu eru vörur sem njóta eiga tollfrelsis við innflutning samkvæmt samningi Íslands um aðild að Fríverslunarsamtökum Evrópu EFTA og fríverslunarsamningi Íslands við Evrópubandalagið skal leggja fram Eur. 1 flutningsskírteini eða vörureikning með upprunayfirlýsingu á. Ljósrit eða myndrit nægir við hraðafgreiðslu en frumrit skal þá lagt fram við fullnaðartollafgreiðslu. Sé þessa ekki gætt getur tollstjóri hafnað fríðindameðferð við fullnaðartollafgreiðslu ef vafi þykir leika á um upprunaréttindi vöru.

Vanti ofangreind tollskjöl eða þeim er í einhverju ábótavant með tilliti til hraðsendingarinnar í heild eða að hluta getur tollgæslan neitað um afhendingu á þeim hluta sendingarinnar sem í einhverju er ábótavant. Afhending skal hins vegar heimiluð á öðrum vörum í sendingunni. Tollgæslan skal skrá athugasemd um ágallann í undirfarmskrá til leiðbeiningar við fullnaðartollafgreiðslu.

Leyfi og vottorð skulu árituð af tollgæslunni eftir því sem við á og send ásamt öðrum tollskjólum til skrifstofu tollstjóra þar sem fullnaðartollafgreiðsla fer fram.

7. gr.

Vörur í hraðsendingum skulu flokkaðar í þrennt í undirfarmbréfi:

1. Í reit 1 skal gera grein fyrir vörum sem um ræðir í f-lið 1. gr. reglna nr. 479/1988 og undanþegnar eru öllum opinberum gjöldum, þ.e. farmskrár, farmbréf, vörureikningar, pökkunarlistar, útskriftir o.þ.h., einnig á tölvumiðlum, sem sent er farmflytjendum, flutningsmiðlurum, bönkum og öðrum til eigin nota endurgjaldslaust og hefur ekkert viðskiptalegt gildi.
2. Í reit 2 skal tilgreina fjölda vörusendinga sem eru undir kr. 1.560 að verðmæti eða jafnvirði 20 SDR.
3. Í reitum sem auðkenndir eru með 3 skal gera grein fyrir hverri sendingu fyrir sig.

Við fullnaðartollafgreiðslu á vörum sem um ræðir í 1. tl. skal aðeins skila einni óútreiknaðri aðflutningsskýrslu í nafni flutningsmiðlara.

Við fullnaðartollafgreiðslu á vörum sem um ræðir í 2. tl. skal aðeins skila einni aðflutningsskýrslu í nafni flutningsmiðlara og skulu aðflutningsgjöld af þeim vera margfeldið

af fjölda sendinga og kr. 450 sem svarar til SDR 5,7732 við gildistöku reglugerðar þessarar og lækka skal eða hækka á þriggja mánaða fresti í samræmi við breytingar á gengi SDR (sérstök dráttarréttindi).

Af öðrum vörum í hraðsendingu skal við fullnaðartollafgreiðslu skila aðflutningsskýrslu fyrir hverja sendingu í nafni viðkomandi innflytjanda.

8. gr.

Flutningsmiðlari skal við fullnaðartollafgreiðslu skila þeim tollstjóra sem leyfi veitti samkvæmt 3. gr. aðflutningsskýrslum ásamt viðkomandi vörureikningum og öðrum tollskjölum innan sjö daga frá lokum uppgjörstímabils, sbr. 9. gr. og standa honum skil á álögðum aðflutningsgjöldum á gjalddaga, sbr. 9. gr.

Liggi fullnægjandi tollskjöl yfir einhverja vöru í hraðsendingu ekki fyrir samkvæmt 1. mgr. skal hún tollafgreidd til bráðabirgða samkvæmt ákvæðum I. kafla reglugerðar nr. 23/1982, um bráðabirgðatollafgreiðslu gegn fjártryggingu.

9. gr.

Uppgjörstímabil vegna hraðsendinga skal vera einn mánuður og gjalddagi 15. dagur næsta mánaðar eftir lok uppgjörstímabils.

10. gr.

Verði um vanskil að ræða samkvæmt 8. og 9. gr. skal tollstjóri synja flutningsmiðlara um frekari fyrirgreiðslu vegna hraðsendinga meðan vanskil vara. Jafnframt skulu dráttarvextir reiknaðir á vangreidd aðflutningsgjöld frá og með gjalddaga og innheimtir í ríkissjóð. Um ákvörðun og útreikninga dráttarvaxta skulu gilda ákvæði 1. mgr. 9. gr. og 10. gr. vaxtalaga nr. 25/1987.

Hafi vangreidd aðflutningsgjöld ekki verið greidd innan fimmtán daga frá gjalddaga eins og hann er ákveðinn samkvæmt 9. gr. skal gengið að sjálfsskuldarábyrgð samkvæmt 4. gr. og nægir einföld krafa tollstjóra til ábyrgðaraðila. Greiðsla skal hafa borist tollstjóra innan sjö daga frá dagsetningu kröfubréfs. Hafi greiðsla eigi borið tollstjóra innan þess tíma getur tollstjóri stöðvað tollafgreiðslu til flutningsmiðlara eða viðkomandi innflytjanda þar til fullnaðarskil hafa verið gerð.

Tollstjóri sem veitt hefur heimild til hraðafgreiðslu samkvæmt reglugerð þessari getur svipt flutningsmiðlara heimildinni vegna ítrekaðra vanskila á greiðslu aðflutningsgjalda svo og ef skilyrðum 2. gr. er ekki lengur fullnægt. Heimildin fellur niður þegar ákvæði 3. mgr. 104. gr. tollalaga nr. 55/1987 eiga við.

11. gr.

Óski flutningsmiðlari eftir afhendingu hraðsendingar utan dagvinnutíma tollgæslunnar skal allur kostnaður sem af því leiðir greiddur sérstaklega samkvæmt ákvörðun tollstjóra.

Flutningsmiðlarar sem heimild fá samkvæmt reglugerð þessari skulu afhenda undirfarmskrár og aðflutningsskýrslur í tölvutäku formi samkvæmt nánari ákvörðun ríkistollstjóra. Tollstjórar skulu því áður en heimild er veitt leita staðfestingar ríkistollstjóra á því að tölvukerfi viðkomandi fullnægi settum kröfum.

12. gr.

Ákvæði reglugerðar þessarar skulu gilda eftir því sem við getur átt um hraðsendingar sem Póst- og símamálastofnunin annast.

Ríkistollstjóri getur sett nánari fyriræli um tollafgreiðslu hraðsendinga eftir því sem þurfa þykir og gert nauðsynlegar breytingar á framkvæmd reglugerðarinnar með tilliti til uppbyggingar tölvukerfis ríkistollstjóraembættisins.

13. gr.

Reglugerð þessi er sett samkvæmt heimild í 6. og 148. gr. tollalaga nr. 55/1987 til að öðlast gildi 1. ágúst 1990. Frá sama tíma falla jafnframt úr gildi heimildarbréf fjármálaráðuneytisins um sama efni. Þó skal flutningsmiðlara heimilt að fresta tölvuvinnslu tollskjala, sbr. 11. gr., um allt að þrjá mánuði talið frá gildistöku reglugerðar þessarar.

Fjármálaráðuneytið, 26. júlí 1990.

Ólafur Ragnar Grímsson.

Guðrún Ásta Sigurðardóttir.

Nr. 328

20. júlí 1990

AUGLÝSING

um ferðaskrifstofur.

Eftirtaldar ferðaskrifstofur hafa skilað til samgönguráðuneytisins fullnægjandi tryggingum samkvæmt 18. gr. laga um ferðamál nr. 79 2. júlí 1985.

Ferðaskrifstofan Úrval/Útsýn
Ferðaskrifstofa Akureyrar
Ferðaþjónusta Flugleiða
Ferðamiðstöðin Veröld
Ferðaskrifstofa Guðmundar Jónassonar
Samvinnuferðir – Landsýn
Ferðaskrifstofa BSÍ
Ferðaskrifstofa Kjartans Helgasonar
Land og saga
Ferðaskrifstofan Atlantik
Ferðamiðstöð Austurlands
Ferðaval
Ferðaskrifstofa Harðar Erlingssonar
Ferðaskrifstofa stúdenta
Evrópuferðir
Íslenskar fjallaferðir

Ferðaskrifstofa Farfugla
Ferðaskrifstofa FÍB
Ferðaskrifstofa Vestfjarða
Flugferðir – Sólarflug
Ferðaskrifstofan Saga
Ferðabær
Ferðaskrifstofa Húsavíkur
Ferðaskrifstofa Reykjavíkur
Ratvís
Ferðaskrifstofan Alís
Norræna ferðaskrifstofan hf.
Ráðstefnur og fundir hf.
Ferðaskrifstofa Íslands
Ferðaskrifstofan Nonni
Transa

Leyfi til reksturs eftirtalinna ferðaskrifstofa hefur fallið niður, sbr. 18. gr. laga um ferðamál nr. 79 2. júlí 1985.

Ferðaskrifstofan Farandi
Skotferðir

Samgönguráðuneytið, 20. júlí 1990.

Steingrímur J. Sigfússon.

Halldór S. Kristjánsson.